

Oqaluuserisassat ataatsimiinneq ammasoq:

Imm. 01 Oqaluuserisassat akuersissutigineri

Aningaasaqarnermut tunngasut

Imm. 3.1 2025-imiit 2026 tungaanut Sisimiuni Maniitsumilu sanaartukkanut naatsorsuutit kiisalu sanaartukkanut aningaasaliissutinik atunngitsuukkanik nuutsineq

Suliassat nalinginnaasut

Imm. 4.1 Oqaluuserisassatut siunnersuut – Innuttaasut amerlassusaat malillugu sanaartornernut aningaasaliissutit

Imm. 4.2 Ukioq atuarfiusumut 2024/2025-mut Qeqqata Kommunianut atuarfinnut pitsaassutsimik nalunaarusiaq

Imm. 4.3 Kangerlussuarmi sivilisussilerikkamik atorfinitsitsineq

Imm. 4.4 Nunatta Kitaani Nunamik allanngutsaaliukkamik pilersitsineq pillugu nalunaarusiaq pillugu tusarniaaneq

Imm. 4.5 Nunaqarfimmi Aqutisunuk tunuarnissamik qinnuteqaat – Dorthe Olsen

Paasissutissiissutit

Imm. 6.1 Nunarsuarmioqatigiinnut kingornussassaqaqarfimmik Aasivissuit – Nipisat suliaqarnerup ingerlaqqinnera

Imm. 8.1 Tamalaat

Ataatsimiinneq ingerlanneqassaaq videokonference atorlugu aallartilluni nal. 08.30

Peqataasut:

Atassut

Bitten Heilmann

Demokraatit

Rachel Ingemann

Erne Olsen

Inuit Ataqtigii

Juliane Enoksen

Winnie Ingemann, *sinniisussatut*

Naleraq

Jens M. Lyberth

Steffen Johansen

Karl Lyberth

Nathan Møller

Siumut

Malik Berthelsen

Evelyn Mølgaard

Barnabas Larsen

Gideon Lyberth

Hans Frederik Olsen

Sika Zeeb-Olsen

Peqataasinnaanani nalunaartoq

Nivi H. Eframsen

Imm. 01 Oqaluuserisassat akuersissutigineri

Aalajangiineq

Imm. 3.1 2025-imiit 2026 tungaanut Sisimiuni Maniitsumilu sanaartukkanut naatsorsuutit kiisalu sanaartukkanut aningaasaliissutinik atunngitsuukkanik nuutsineq

Journal nr. 06.02.01

Tunuliaqutaq

Ilanngussaq 5-imi takuneqarsinnaallutik sanaartukkanut ingerlasunut sanaartugassanullu sulii aallartinneqanngitsunut tunngatillugu, 2025-mi aningaasaliissutinik atunngitsuukkanik 2026-mut missingersuutitut nuutsinissamik Teknikkeqarnermut Avatangiisinullu immikkoortorta matumuuna siunnersuuteqarpoq.

Sisimiuni Maniitsumilu sanaartugassatut suliaassani naammassisani tullinnguttuni sanaartornermut naatsorsuusiortoqarnikuvoq, takuuk ilanngussaq 1-4:

- 500355 ATV-nut aqqut Immikkoortoq 2, Sisimiut
- 500384_004 Bussinut inissiisarfik, Maniitsoq
- 500405 Itilleq Illorput 2100 Allannortitsineq, Sisimiut
- 500430 Sarfat tungaanut aqqusineramik talliliineq, Maniitsoq

Maleruagassatigut tunngavigisat

Karseqarnermut naatsorsuuserinermullu malittarisassat. Sanaartornermut tunngasut TA-mit akisussaaffigineqarput.

Sanaartukkanut naammassinikunut sanaartornermut naatsorsuusiortoqartartussaavoq. Sanaartornermi naatsorsuutit Teknikkeqarnermut ataatsimiititaliamit, Aningaasaqarnermut ataatsimiititaliamit Kommunalbestyrelsimiillu akuersissutigineqartussaapput, malitsigisaanillu kukkunersiuisunit atsiorneqarlutik.

Pissutsit atuuttut

Ataani eqitsimmi aningaasanik sinaakkutitalimmik sanaartornermilu aningaasartuutivinnik allasimasunik sanaartugassatut suliaassat tullinnguuttut naammassereerput atorneqalereerlutillu:

Atuiffiup taaguutaa	Sanaartornissami aningaasaliissutit, Kr.	Sanaartornermut aningaasartuutit, Kr.	Nikingassut
500355 ATV-nut aqqut immikkoortoq 2, Sisimiut	24.723.699,00	23.241.952,05	1.481.746,95
500384_004 Bussinut inissiisarfik, Maniitsoq	8.000.000,00	7.644.638,06	355.361,94
500405 Itilleq Illorput 2100 Allannortitsineq, Sisimiut	500.000,00	588.900,00	- 88.900,00
500430 Sarfat tungaannut aqqusineramik talliliineq, Maniitsoq	2.500.000,00	1.975.600,00	524.400,00
*Kommunip aningaasartuutaani nikingassutit katillugit			2.272.608,89

*Aningaasaliissutit nikingassutaanik naatsorsuineq siulequtaasa isumai atorlugit, - = sippuilluni atuineq, + = atuinikin-neq.

Sanaartornermi suliassat nuutsinneqarnissamut qinnutigineqartut takussutissiami ilanngussa 5-imi qalipaasorsorneqarput. Suliami Sisimiut Maniitsullu eqqaani sanaartornerit kiisalu ataatsimoorussamik suliassat pineqarput. Quleriiaani "Oqaaseqaatit" ataani sanaartugassanut pilersaarutini aningaasanik atunngitsuukkanik nuutsitsinissamik kissaatigineqarnerit sumiiffinni allassimapput.

Illunik nutarsaanernut, Avatangiiisinillu tapiissutitut ukiumut aningaasaliiffigineqartartunut atunngitsuukkanut nuutsinissaq qinnuteqaatigineqanngilaq, ukiumoortumik ingerlatsinermut aningaasaliissutaanerorpasimmata aammalu Ingerlatsinermut immikkoortortamit ingerlanneqartuullutik. Suliniutinut naammassisanut inaarutaasumillu akilerikkannut aningaasanik atunngitsuukkanik nuutsisoqarnissaanik qinnuteqartoqanngilaq.

Atuilluatuunissakkut kingunerisinnaasat

Kingunissaqanngilaq, sanaartukkat aallartisarneqareersut naammassineqarnissaannut aningaasaliisutit nuutsinneqarnissaat pisariaqarpoq.

Aningaasaqarnikkut allaffissornikkullu kingunerisinnaasai

Naatsorsuutit naammassineqartut malitsigisaanik kukkunersiuusunit akuerineqartussat. Namminersorlutik Oqartussanik tapiiffigineqartumik sanaartugassatut suliassani, sanaartornermut naatsorsuutit kukkunersiuusut atsiugaasa assilinerat Namminersorlutik Oqartussanut nassiunneqassaaq. Sanaartornermi suliassanut sippuilluni atuneq karsimiittuutitut matussuserneqartarpoq, sanaartornermilu suliassanut atuinikinnerunerit karsimiittuutitut utertinneqartarlutik.

Sanaartukkanut isumaqatigiissuteqarfioersunut naammassinninnissamut kommuni pisussaaffeqarpoq. Sanaartugassanut entreprenørinut suli isumaqatigiissusiorfiunngitsunut, suliniut pisariaqartutut isigineqarunnaarsimappat maannamut killiffiani unitsinneqarsinnaavoq, kisianni siunnersortitut akissarsiarititut suliniutip unitsinneqarfiani killiffiup tungaanut akilerneqassallutik.

Suliniutinut suli aallartinneqanngitsunut sanaartugassatut kissaat pillugu paasissutissanik amerlanerusunik amigaateqarfiusuni aammalu sanaartornissamut pilersaarutitaqanngitsuni, suliniut kissaatigineqarunnaarsimappat sulianut taakkununga isumaqatigiissutitut pisussaaffinnik isumaqatigiittoqarnikuunaniluunniit, aningaasanik nuutsinissaq pinngitsuuginneqarsinnaavoq.

Allaffeqarfiup naliliinera

Sanaartukkanut naatsorsuutit

500355 ATV-nut aqqut immikkoortoq 2, Sisimiut

Imeqarfik sinerlugu Kangerluarsuk Tulliup tungaanut aqqusinerimik kiisalu ATV-nut aqqummik pilersitsineq 2025-mi juulip qiteqqunnerani atorneqalerpoq. Imeqarfik sinerlugu aqqusineq ASN-imit ilaatinneqarpoq, taamaalilluni piffissap ingerlanerani suliniut akisunerulerluni. ATV-nut aqqut aserfallatsaalineqartarnissaa pitsanngorsarneqartarnissaalu Ingerlatsinermut immikkoortup ataani atuiffimmut 562040800 tunniunneqarpoq.

500384 004 Bussinut inissiisarfik Maniitsoq

Suliaq 2025-mi aggustimi tunniunneqarpoq aammalu 355.361 koruuninik atuinikinnerulaarfiulluni, tamannalu isumaqatigiissusiornermi 479 t.koruuninik sipaarutaasinnaasunik paasinnittoqarnikuuneranik peqquteqarpoq. Supoortumik kiassarnermik natermilu illersuutaasussanik suliniutinik ingerlatsioqarnikuuvoq, taakku ingerlatsinermi aningaasartuutikinnerunissamut ilaanissaat naatsorsuutaavoq.

500405 Itilleq Illorput 2100 Allannagortitsineq

Ilaqtariinnut illumik nunaqarfimmut tamarmut ataatsimoorussamik illunngortillugu allanngortitsineq 2025-mi martsimi tunniunneqarpoq. 88.900,00 koruuninik atuivallarneq suliariumannittussarsiuussereernerup kingorna isumaqatigiissusiorfigisamut atasunngortinneqarsinnaavoq.

500430 Sarfat tungaannut aqqusinnermik talliliineq, Maniitsoq

Suliaq septembarip 23-anni tunniunneqarpoq, amigaatit paasineqartut iluarsineqareerput aqqusinerlu atorineqalereerluni. 524.400 koruuninik atuinikinneruneq aningaasaliissutinit tamakkiisunit 21 procentiuvoq aammalu annertunerusumik naatsorsuutigeqqaakkamiit suliaq akikinneruneranik peqquteqarpoq.

Sanaartugassatut sulianut sisamanut atuinikinneruneq tamarmiusoq kommunimut 2.272.608 koruunivoq.

Aningaasanik atunngitsuukkanik nuutsineq

ERP-system malillugu suliniutip normui qaffakkiartortut malillugit allattugaasut sanaatornermut suliasanut suliniutit normui eqitsimmi ilanngussaq 5-mi allattorsimapput.

Aningaasanik ilanngaataqanngitsunik 251.249.483,65 koruuninik nuutsisoqarnissaa qinnuteqaatigineqarpoq. Suliani naammasseriikkani aningaasat sinneruttut 2.272.608 koruuniusut nuut-sinneqarnissaat qinnuteqaatigineqanngilaq, taakku karsimut utertinneqassapput.

Suliamik saqqummiussaq una 2026-mi januaarip 30-anni 2025-mut naatsorsuutinit kisitsiugallartut malillugit suliaavoq. Ullup taassuma kingorna naalernerani akiligassissutit naatsorsuutinit ikkunneqassappata ilanngussaq 5-mi aningaasartai nalimmassarneqassapput.

Innersuussut

Teknikkeqarnermut ataatsimiititaliamut, Aningaasaqarnermut ataatsimiititaliamut Kommunalbestyrelsimullu innersuussutigineqarpoq:

-sanaatornermut naatsorsuutit taakku sisamat akuerineq**assasut**.

Teknikkeqarnermut ataatsimiititaliap Aningaasaqarnermut ataatsimiititaliamut innersuussutigissagaa, 2025-mi missingersuutinit sanaatornermut aningaasaliissutinik atunngitsuukkanik katillugit 252.287.535,57 koruuninik 2026-mut nuutsisoq**assasooq**, ilanngussaq 5-imi tulleriarlugit allanneqarnikuusutut sanaartugassatut pilersaarutini ataasiakkaani aningaasat agguataagaallutik.

Teknikkeqarnermut ataatsimiititaliap suliamik suliarinninnera

Ataatsimiititaliap 12. februar 2026 ataatsimiinnerani innersuussutigineqartut akuersissutigineqarput

Innersuussut

Teknikkeqarnermut ataatsimiititaliap Aningaasaqarnermut ataatsimiititaliamut innersuussutigivaa,

- Sanaatornermut naatsorsuutit taakku sisamat akuerineq**assasut**
- 2025-mi missingersuutinit sanaatornermut aningaasaliissutinik atunngitsuukkanik katillugit 252.287.535,57 koruuninik 2026-mut nuutsisoq**assasooq**, ilanngussaq 5-imi tulleriarlugit allanneqarnikuusutut sanaartugassatut pilersaarutini ataasiakkaani aningaasat agguataagaallutik

Aningaasaqarnermut ataatsimiititaliap suliamik suliarinninnera

Ataatsimiittitaliap 17. februar 2026 ataatsimiinnerani innersuussutigineqartoq akuersissutigineqarput.

Innersuussut

Aningaasaqarnermut ataatsimiittitaliap Kommunalbestyrelsimut innersuussutigivaa akuereqqullugu,

- Sanaartornernut naatsorsuutit taakku sisamat akuerineq**assasut**
- 2025-mi missingersuutinit sanaartornernut aningaasaliissutinik atunngitsuukkanik katillugit 252.287.535,57 koruuninik 2026-mut nuutsisoq**assasoq**, ilanngussaq 5-imi tulleriarlugit allanneqarnikuusutut sanaartugassatut pilersaarutini ataasiakkaani aningaasat agguataagaallutik

Aalajangiineq

Ilanngussaq

Tullinnguuttunut sanaartornernut naatsorsuutit:

Ilanngussaq 1	Suliniut 500355	ATV-nut aqqut immikkoortoq 2, Sisimiut
Ilanngussaq 2	Suliniut 500384_004	Bussinut inissiisarfik, Maniitsoq
Ilanngussaq 3	Projekt 500405	Itilleq Illorput 2100 Allannortitsineq, Sisimiut
Ilanngussaq 4	Projekt 500430	Sarfat tungaanut aqqusinnermik talliliineq, Maniitsoq

Aningaasanik atunngitsuukkanik nuutsineq:

Ilanngussaq 5 Eqitsit, Sanaartugassanut aningaasaliissutinik atunngitsuukkanik 2025-mi missingersuutinit 2026-mi missingersuutinit nuutsineq atuiffiit aningaasallu.

Imm. 4.1 Oqaluuserisassatut siunnersuut – Innuttaasut amerlassusaat malillugu sanaartornernut aningaasaliissutit

Journal nr. 17.15

Tunuliaqutaq

Kommunalbestyrelsesemi ilaasortaq Hans Frederik Olsen (S) 2026-mi januaarip 13-anni mailikkut oqaluuserisassatut siunnersuummik nassiussaqqarpoq:

Inuttussuseq aallaavigalugu sanaartugassanik aningaasalersuisalernissamik siunnersuut.

Ullumikkut missingersuuserinermi periuseq atortillugu inoqarfit ilaat annertuallaamik imaluunniit annikippallaamik aningaasaliivigineqartarnerannik oqallittoqartarpoq.

Inuttussuseq aallaavigalugu agguaasalernikkut tamanna allanngortinneqarsinnaavoq, taamaalilluni inoqarfiit tamarmik naligiinnerusumik aningaasaliivigineqartalernissaat anguneqarsinnaalluni. Aamma taamaaliornikkut nunaqarfiit tamarmik sanaartugassanut aningaasanik immikkoortitsivigineqartarnissaat qulakkeerneqarsinnaavoq. Ullumikkummi pingaarnersiuinermi nunaqarfiit ilaat pingaarnersiuinermi sanaartugassatigut ilanngunneqanngitsoortarnerat nunaqarfimmiuniit misigineqartarpoq. Inuttussuseq aallaavigalugu aningaasalersuisalernikkut nunaqarfimmiut namminneq kissaataasa sukkanerusumik piviusunngortinneqarsinnaanerat taamaalilluni aamma anguneqarsinnaavoq.

Immikkut annertunerusumik nunaqarfinni pisariaqartitsisoqartillugu, soorlu nutaamik meeqqeriviliortoqassappat atuarfiliortoqassappalluunniit annertunerusumik aningaasaliisinnaanissaq soorunami periarfissaajuaannarnissaa ammatinneqassasoq aamma naatsorsuutigaa.

Maleruagassatigut tunngavigisaq

Sanaartornermi neqerooruteqartitsisarneq pillugu Inatsisartut inatsisaat pillugu Namminersorlutik Oqartussat nalunaarutaat nr. 9, 20. august 2021-meersoq.

Sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-meersoq.

Pissutsit atuuttut

Maannakkut Qeqqata Kommuniani sanaartornermut tunngatillugu agguaassinerup agguaassisarnermi malitassaqaqqanngilaq, tamakku missingersuutit pillugit isumaqatigiinnermi pingaarnersiorneqartarmata. Paarlattuanik sanaartornermut aningaasaliissutinik agguaasseriaataasinnaasumik takunninnissaq pitsaassaaq, taamaalillutik sanaartortakkat innuttaasut amerlassusaannut tunngatillugu pitsaannerusumik tulluarsarneqarsinnaallutik.

Innuttaasoq ataasiugaangat sanaartornermi aningaasaliissutinik agguaassinerup iluaqutissartaris-savaa, inoqarfinnit minnernit illoqarfinnut pitsaannerusumik ineriartortitsinerit qulakkeerinneqataan-issaat, taamaaliornikkut inuiaqatigiit pitsaannerusumik ineriartornerat qulakkeerneqassaaq aammalu nunaqarfinni nunaqarfinnilu ineriartortitanut ataasiakkaanut suliarinninnissanut naamaattunik aningaasassaqaqqassalluni.

Sanaartornernut aningaasaliissutit sunniutilimmik siunertamullu naapertuuttumik atorneqartarnis-saasa qulakkerneqarnissaannut eqqortumik suliniut piginnaasanik ilisimasanilu qulakkeerrinninnis-samut peqarnissaq.

2025-miit 2026 tungaanut sanaartornermut aningaasaliissutit nuunneqartut innuttaasut amerlassusaat ataasiugaangat qanoq agguataarneqartarnersoq qiviaraanni, taava agguataarineq tullinnguuttutut isikkoqarpoq

Illoqarfik	Innuttaasut amerlassusaat	Sanaartornermut aningaasaliissutit 2026-mut nuunneqartut	Innuttaasut ataasiugaangat sanaartornermut aningaasaliissutit
Maniitsoq	2.519	Kr. 57.137.286	Kr. 22.682,52
Atammik	184	Kr. 1.323.531	Kr. 7.193,10
Napasooq	65	-	-
Kangaamiut	295	Kr. 28.557.274	Kr. 96.804,31
Sisimiut	5.485	Kr. 107.999.599,77	Kr. 19.689,99
Itilleq	100	-	-
Sarfannuguit	91	Kr. 292.391	Kr. 3.213,08
Kangerlussuaq	440	Kr. 5.694.472,97	Kr. 12.941,98

*ataatsimoorssamik ingerlatsinerit kuuffissuarnullu aningaasaliissutit naatsorsuinerit ilanngunneqanngillat

Atuilluartaunissakkut kingunerisinnaasat

Illut naggataagut ingutserinaannangorlutik aserfallatsaaliinissamut kinguleruteqqaneq ima anner-tutigilerani, illunik sulit aserfallatsaaliiginnarnissap qulakkeerneqarnissaa pingaaruteqarpoq. Taamaattumik illunik aserfallatsaaliisarnissat aammalu innuttaasut amerlassusaat malillugu ineri-artornerup qulakkeerneqarnissat atuilluartauneruvoq.

Allaffeqarfiup naliliinera

Allaffeqarfiup naliliinerivaa, sanaartornermut aningaasaliissutit sanaartornermut aningaasaliissutit aningaasat atorsinnaasat tamakkisunit agguataarinerit malitassamik suliaqarnikkut naatsorsorne-qarsinnaassasoq aammalu innuttaasut amerlassusaannik avillugu.

Qeqqata Kommuniani 2025-mi innuttaasut katillugit 9.179-iupput illoqarfinnut nunaqarfinnullu tul-linnguuttunut agguataarsimallutik

Maniitsoq	2.519
Atammik	184
Napasooq	65
Kangaamiut	295
Sisimiut	5.485
Itilleq	100
Sarfannuguit	91
Kangerlussuaq	440

Kommunalbestyrelsen malittarisariaqagassaatus assigiinngitsut naatsorsorneqarsinnaapput, peri-usaasinnaasut ilagaat inoqarfiup annertussusaa ukiumut sanaartugassanut aningaasaliissummik kommunip tamakkiisumi innuttaasut amerlassusaat gangerlugu, taamaaliornikkut inoqarfik ataasiu-gaangat sanaartornermut aningaasaliissutit agguataarlutik.

Agguaasseriaaseq pillugu inaarutasumik aalajangiisoqartinnagu tikkuassallugu pingaaruteqarpoq, sanaartugassat suliaasnik ataatsimoorussaqaartaratta soorlu kuuffissut, aqquuserngit, biilnik pisi-nerit kiisalu sulit atualinngitsunut allanullu atugassiaasut namminersorlutik oqartussat ataatsimoo-russamik aningaasaliissutaat. Taamaattumik innuttaasut amerlassusaat malillugu agguataasasooq kommunalbestyrelsen akuersissutigippagu sanaartornermut aningaasaliissutit agguataa-risarneq pillugu missingersuutit pillugit isumasioqatigiinnissamut saqqummeerussupput.

Innersuussut

Allaffeqarfiup innersussutigivaa, Kommunalbestyrelsi ataatsimiinnermini siunnersuut eqqartussagaa ammalu siunissami innuttaasut amerlassusaat malillugu aningasaliissutit agguarneqartassanersut aalajangiullugu.

Aalajangiineq

Ilanngussaq

1. Hans Frederik Olsen (S) e-mailerutaa
2. Sanaartugassanit angaasaliissutit piffikkaartumik inissisimaffii

Imm. 4.2 Ukioq atuarfiusumut 2024/2025-mut Qeqqata Kommunianut atuarfinnut pitsaassutsimik nalunaarusiaq

Journal nr. 51.00.21.02

Tunuliaqut

Ukiut tamaasa atuarfeqarfiit oktobarip aallaqqaataa nallertinnagu pitsaassutsimut nalunaarusiortarput. Pitsaassuseq pillugu nalunaarusiap imarivaa ukioq atuarfiusoq kingulleq pillugu paasissutissat. Pitsaassutsimik nalunaarusiat paasissutissartaat pingaarnert katersorneqartarput, pitsaassutsimut nalunaarusiamut ataatsimut katersorneqarlutik.

Maleruagassatigut tunngavigisat

Atuarfik pillugu Inatsisartut inatsisaat nr. 15, 3. december 2012-imeersumi § 49 imm. 2.

Pissutsit atuuttut

Allaffeqarfiup pitsaassutsimik nalunaarusianit paasissutissat katersorlugit ataatsimoorussamik pitsaassutsimik nalunaarusiannngortinnikuuai. Atuarfeqarfimmi suliniutissat eqqartorneqarnissaanni, ataatsimoortumik pitsaassuseq pillugu nalunaarusiaq atorineqartariaqarpoq. Pitsaassutsimik nalunaarusianit oqariartuutit pingaarnert saqqummiunneqarput ugguuna:

Pitsaassutsimik nalunaarusiami eqikkaaneq

Atuartut akornanni atuagarsornikkut piginnaasat qaffassarneqarnissaat anguniarlugu alloriarfinni inaarutaasumillu misilitsinnerit inernerit ukkatarineqarput. Atuartitsissut Matematikkimi nukittorsaaviginiarlugu, atuartitsissummi matematikkimi atuartut piginnaasaasa / angusaasa naggataatigut pitsanngorsaaviginiarlugit, atuartitsissummi Matematikkimi piginnaanngorsaasoqarnissaa (Matematikkimi atuartitsisut) pillugu Kalaallit Nunaanni Ilisimatusarfik (ilinniartitsisunngorniartarfik) Nalunnguarfiup Atuarfianiit januaari 2025-miit suleqatigineqalerpoq. Taamatuttaaq Minngortuunnguup Atuarfiani Matematikkimi ilinniaqqinneq ingerlanneqarpoq – periutsillu ilikkarnarnerit eqqunniarneqarlutik. Matematikstrategi siammarterniarneqarpoq. Nukarlerniillu toqqammaviliineq aallarnisarneqarluni. Tamatumuunalu paasinaqqissaarnermi pikkorissarnerit ingerlanneqarput aammalu atuartut atuarnissamut unamminartuutillit paasineqarnerulerlutillu ikiorneqarput. Ilaatigut qallunaatut atuarnermi ikiorneqarlutik.

Pitsaassutsimik nalunaarusiami siuliani kommunip karakterinut agguaqatigiissitsinera suaassutsinut sanilliussilluni aggulunneqarsinnaasimavoq, uanili Kalaallit Nunaanni naatsorsueqqissaartarfimminngaanniit kisitsisit pineqartumut ukioq atuarfiusumut nutarterneqanngimmata pitsaassutsimik nalunaarusiami tamanna misissoqqissaarneqarsinnaasimannngilaq. Amerlasuutigulli diagrammini nalinginnaasumik nivarsiaqqat nukappiaqqaniit atuartitsissutini tamani oqaluttariarsornikkut allattariarsornikkullu ajunnginnerumik angusaqartartut takuneqarsinnaavoq. Tassani nukappiaqqaniit atuartitsissutini tamani nivarsiaqqat allattariarsornikkut ukiumoortumik karakteriginnerusarlutik. Aammattaq nukappiaqqaniit atuartitsissutini tamani nivarsiaqqat oqaluttariarsornikkut ukiumoortumik karakteriginnerungaartut takuneqarnikuuvoq.

Alloriarfinni misilitsinnerit inernerat

Alloriarfinni misilitsinnerit inernerit takutippaat, Qeqqata Kommuniata aturfii atuartitsissutitut alloriarfinnullu tamanut agguaqatigiissinnerisa takutikkaat, atuartitsissutini matematikkimi atuartitsissummilu qallunaatoornermi ilinniarnermi sulit pitsanngorsaalluni suliaqartoqartariaqartoq, inernerit takutimmasuk taakku suliasat affaat sinnerlugit kukkusumik suliarineqarsimasut.

Pitsanngorsaaniarluni sulineq ingerlavoq, aatsaallu piffissami qaninnermi aallartarneqarluni, tamaattumillu inernerit malunnaatilimmik pitsanngoriarneri sulit takuneqarsinnaannginneranut peqqutaasinnaanera ilimanarpoq.

Illoqarfinni atuarfinni 7. klassinut atuartsissutit matematikkip ataani agguaqatigiissitsilluni kisitsit appasinnerpaaq 35-usoq Atuarfik Kilaaseqqamiippoq. Illoqarfinni atuarfinni 7. klassinut atuartsissutit tuluttoornerup ataani agguaqatigiissitsillunilu kisitsit qaffasinnerpaaq 85-iusoq Minngortuunnguup Atuarfianiippoq.

Atuarfik Kilaaseqqami 3. klassit 7. klassillu amerlanersaat atuartsissutini tamangajanni suliasamik affaat kukkusumik akinikuuvaat. Tamannalu agguaqatigiissitsinnermut apparsaataavoq. Nalunnguarfiup Atuarfiani 3. klassit 7. klassillu suliasat affangajaat affaalluunniit sinnerlugit annerusumik minnerusumilluunniit eqqortumik akinikuullugit.

Soraarummeerluni misilitsinnermi inernerit

Kalaallisoornermi Nalunnguarfiup Atuarfia agguaqatigiissitsinnermit qaffasinnerulaarluni pitsaanerpaamik ingerlavoq aammalu illoqarfinni atuariit tamarmik kalaallisoornermi piginnaasanik misilitsinnermi qaffaseqatigiipput.

Piginnaasanik misilitsinnermi tamani appasinnerpaamik agguaqatigiissitsinnermiilluni qallunaatut piginnaasanik misilitsinnerit allaanerupput, tamatumani Atuarfik Kilaaseeq appasinnerpaamik agguaqatigiissitsinnermiilluni. Minngortuunnguup Atuarfia aamma Nalunnguarfiup Atuarfia ajunnginnerulaartumik angusaqarput.

Matematikkimi Nalunnguarfiup Atuarfia qaffasinnerpaamik agguaqatigiissitsinnermi angusaqarpoq, tassani Minngortuunnguup Atuarfia aamma Atuarfik Kilaaseeq appasinnerusumik agguaqatigiissitsinnermi angusaqarfiullutik.

Tuluttoornermi piginnaasanik misilitsinnermi atuariit tamarmik akunnattumik qaffasissusilimmik agguaqatigiissitsinnermiipput.

Kalaallisoornermi allattariarsorluni misilitsinnerit aamma piginnaasanik misilitsinnerit qaffasingaatsiartumik agguaqatigiissitsinnermiillutik allaanerusumik inissimapput, tassani illoqarfinni atuariit tamarmik imminnut qaffaseqatigiillutik. Paarlattuanik piginnaasanik misilitsinneruulli allattariarsornerit, oqaluttariarsornerit appasissumik agguaqatigiissitsiffimmiillutik allaanerusumik inissimapput, tassanittaq illoqarfinni atuariit tamarmik imminnut qaffaseqatigiingallutik.

Qeqqata Kommuniani atuartsit soraarummeertussat amerlanersaat projekteqarlutik suliaqarnermi qaffasissumik agguaqatigiissitsiffimmiillutik ingerlalluarputtaaq, tassani agguaqatigiissitsineq GGS-skalamut sanilliullugu pitsaasup ajunngilluinnartullu akornanni inissisimallutik.

Atuanngitsoortarneq

Illoqarfinni atuarfinni akuerisaanngitsumik atuanngitsoortarnerit ukioqqortusiartorneq malillugu sulit qaffakkiartortarput. Nalunnguarfiup Atuarfiani nukarluni akullernilu appasinnerpaamik agguaqatigiissitsiffimmiillutik. Illoqarfinni atuarfinni allani sanilliussilluni Atuarfik Kilaaseeq qaffasingaatsiartumik akuerineqanngitsunik atuanngitsoorfiusarluni allaanaruvoq. Aammattaaq akuerineqarluni atuanngittarneq taamaappoq, klassini alloriarfini tamani akuerineqarluni atuanngittarneq qaffasingaatsiartarluni Atuarfik Kilaaseeq allaanerusumik inissisimavoq. Tassani Nalunnguarfiup Atuarfiani aammaarluni akuerineqarluni atuanngiffiusarluni aallaanerusumik inissisimavoq. Tamatuma Nalunnguarfiup Atuarfiata atuartsit atuanngittarnerisa apparsarneqarnissaannik suliaqarnera ajunngilluinnartumik iluatsissimavoq.

Illoqarfinni atuarfinnik sanilliussilluni nunaqarfinni atuarfinni atuartsit atuanngittarnerat nunaqarfimmiit nunaqarfimmut nikerartuusoq takuneqarsinnaavoq. Nunaqarfinni akuerineqarani atuanngittarneq appasingaatsiarpoq. Tassani nunaqarfinni ataasiakkaani qaffasingaatsiartoq takuneqarsinnaalluni. Assersuutigalugu Napasumi 1.-3. klassit 9,9 procenti akuerineqaratik

atuangitsoortarput aammalu Kangaamiut Atuarfiani 9.-10. klassit 6,4 procentii akuerineqaratik atuangitsoortarlutik.

Sisimiuniit illoqarfimmi atuarfinnik sanilliussissagaanni nunaqarfinni akuerineqarluni atuangittarneq qaffasilaarpoq, kisianni Atuarfik Kilaaseeqqamik sanilliussigaanni, atuangittarnermut procenti appasinneruvoq, holdenili ataasiakkaani qaffaseqatigipjaarlugu.

Pitsaassutsumik nalunaarusiami matumani ilinniartitsisut sulinngittarnerat appasissumik inissisimavoq. Ilinniartitsisunut akuerineqarani sulinngittarnerit nungungajaavissimasut, ukioq kingulleq pitsaassuseq pillugu nalunaarusiatigut anguneqarpoq. Pitsaassutsumik nalunaarusiami matumani Kangaamiut Atuarfiat aamma Sarfannguit Atuarfiat ilinniartitsisunit akuerineqarani sulinngittarnernik takkussiffiupput.

Illoqarfinni atuarfiit ingammik ataatsimut ilinniartitsisuni sulinngitsoorfiunerupput, tassani sulinngitsoortarneq 5 procent sinnerlugu inissisimalluni. Aammalu ingammik Nalunnguarfiup Atuarfiani ilinniartitsisut qaffasinnerusumik sulinngitsoortarnermut procenteqarlutik. Nunaqarfinni atuarfiit ilinniartitsisut sulinngitsoortarnerat ataatsimut appasinnerulluni.

Atuarfiit 5% sinnerlugu inissisimasut ilinniartitsisut atuartullu peqanngittarnerannik apparsaaniarsarissapput.

Aningaasaqarnikkut allaffissornikkullu kingunerisinnaasai

Aningaasatigut allaffissornikkullu kingunissaqanngilaq.

Allaffeqarfiup naliliinera

Pitsaassutsumik nalunaarusiat imarisai pitsaassutsumut nalunaarusiamut ataatsimut katersorneqarput, Ilinniartitaanermut ataatsimiititaliamut kiisalu Kommunalbestyrelsimut paasissutissiissutitut oqallisissiatullu saqqummiunneqartarlutik.

Illoqarfinni atuarfinnit nunaqarfinnilu atuarfinnit tamanit pitsaassutsumut nalunaarusianik qulingiluanik allaffeqarfik tigusaqarnikuuvoq.

Pitsaassutsumik nalunaarusianik angusanillu nalilersuineramik qulinngiluaasunik eqikkaasutut pitsaassutsumik nalunaarusiamik ataatsimoorussamik suliaqartoqarnikuuvoq.

Kommunip atuarfiinut pitsaassutsumut nalunaarusiat ataatsimoortut atuarfeqarfimmi aqutsinermi sakkutut atorneqarsinnaapput, allaffeqarfimmut politikkerinullu pisariaqartutigit takunnilluarsinnaanermut pisarialimmik pilersitsisinnaammata. Ataatsimoortumik pitsaassuseq pillugu nalunaarusiaq kommunip nittartagaatigut tamanut saqqummiunneqassaaq.

Pitsaassuseq pillugu nalunaarusiat, kommunalbestyrelsip atuarfinnik nakkutilliinerani aallaavittut atorneqassapput. Taamaattumik kommunalbestyrelsip nakkutilliilluni ukiumoortumik alakkarerinerani kiisalu atuarfinni siulersuisut aamma Ilinniartitaanermut ataatsimiititaliap (takuuk attaveqarnissami nakkutilliinissami pilersaarut) oqaloqatigiittarnerini pitsaassuseq pillugu nalunaarusiat atorneqartassapput.

Atuilluartuunissakkut kingunerisinnaasat

Pitsaassuseq pillugu nalunaarusiat atuarfeqarfinni suliat pillugit ersarinnerulersitseqataasarput. Pitsaassuseq pillugu nalunaarusianik siunertaasoq tassaavoq, atuarfinni ataasiakkaani kiisalu Qeqqata Kommuniani atuarfeqarfiit ataatsimut isigalugit ineriartornikkut isiginiarneqarnerulernissaat. Kommunalbestyrelsip, ingerlatsiviup aamma atuarfiit akornanni atuarfinnik ataasiakkaanik nalilersuineq aamma atuilluartuusumik ineriartortitsineq pillugu

tulleriiaakkamik uppersaanissamut suleqatigiinnerullu qulakkeerneqarnisaaanut pitsaassutsimut nalunaarusiat sakkussaapput.

Innersuussut

Ilinniartitaanermut ataatsimiititaliamut innersuussutigineqarpoq:

- Atuarfiit pitsaassutsimut nalunaarusiaat aamma ataatsimoortumik pitsaassutsimik nalunaarusiaq tusaatissatut tiguneqassasut
- Ataatsimoortumik pitsaassutsimik nalunaarusiamit angusat eqqartorneqassasut
- Suliaq kommunalbestyrelsimut ingerlateqqinneqassasut

Ilinniartitaanermut ataatsimiititaliap suliamik suliarinninnera

Ataatsimiititaliap 9. februar 2026 ataatsimiinnerani innersuussutit tusaatissatut tiguneqarput. KB-mut ingerlateqqinneqassasut.

Innersuussut

Ilinniartitaanermut ataatsimiititaliap Kommunalbestyrelsimut innersuussutigivaa akuereqqullugu,

- Atuarfiit pitsaassutsimut nalunaarusiaat aamma ataatsimoortumik pitsaassutsimik nalunaarusiaq tusaatissatut tiguneqassasut
- Ataatsimoortumik pitsaassutsimik nalunaarusiamit angusat eqqartorneqassasut

Aalajangiineq

Ilanngussaq

1. Ataatsimoorussamik Pitsaassuseq pillugu nalunaarusiaq 2024/25_grl
2. MA-mi ukiumi atuarfiusumi 2024-25-imi pitsaassuseq pillugu nalunaarusiaq_grl
3. Nalunnguarfiup Atuarfianit pitsaassutsimik nalunaarusiaq 2024/25_grl
4. Atuarfik Kilaaseeqamit pitsaassutsimik nalunaarusiaq 2024/25_grl
5. Qinnuata Atuarfianit pitsaassutsimik nalunaarusiaq 2024/25_grl
6. Kangaamiut Atuarfianit pitsaassutsimik nalunaarusiaq 2024/25_grl
7. Napasup Atuarfianit pitsaassutsimik nalunaarusiaq 2024/25_grl
8. Itillip Atuarfianit pitsaassutsimik nalunaarusiaq 2024/25_grl
9. Atammiup Atuarfianit pitsaassutsimik nalunaarusiaq 2024/25_grl

Imm. 4.3 Kangerlussuarmi sivilissusilerikkamik atorfinitsitsineq

Journal nr. 03.01.03

Tunuliaqut

Ukiuni arlaqartuni Qinguata Atuarfia ilinniartitsisutut perorsaasutullu ilinniarsimasunik sulissusarsiornermut atorfinitsitsinnarnissamullu ajornartorsiuteqarnikuvoq. Tamanna atuartsinermut pitsaassutsimut ataavartitsinermullu unaminartitsivoq. Mittarfiup annikillisinneqarnerata kingorna pissutsit ajorseriarnikuupput, tamatuma nunaqarfimmi atugassarititaasunik allanngortitsinikuvoq aammalu sulissusarnik piginnaasaqarlartunik orniginarsaanissamut ajornarnerulersitsilluni. Maannakkut Qinguata Atuarfiani sivilissusilerikkamik atorfinitsitaqanngilaq. Taamaattumik Qinguata Atuarfiani sulissusarsiornermut atorfinitsitsinnarnissamullu suliniuteqarneranut immikkut sivilissusilerikkamik atorfinitsitsisarnermik pilersitsinissamut politikkikkut isummertoqarnissamik kissaateqartoqarpoq.

Maleruagassatigut tunngavigisaq

- Meeqqat atuarii pillugit Inatsisartut inatsisaat, meeqqat atuariinik ingerlatsinermut inuttalersuissamullu kommunit akisussaaffinik aalajangersaasoq.
- Ilinniartitsisutut perorsaasutullu sulisunut isumaqatigiissutit atuuttut atorfinitsitsinermilu aalajangersakkat, matumillilimmik piffissaliilluni atorfinitsitsinissamut periarfissat.
- Pisortat immikkoortortaanni sivilissusilerikkamik atorfinitsitsinissamut Naalakkersuisut aalajangersagaat, immikkoortuni avinngarusimanerusuni sulissusarsiornermut atorfinitsitsinnarnissamullu atorqarsinnaasut.

Pissutsit atuuttut

Mittarfiup annikillilerneqarneranit atuuttut 75-iniit 53-inut apparipput. Atuarfik qulinik aalajangersimasumulisooqarpoq, taakkunannga sisamat ilinniartitsisutut/perorsaasutut ilinniagaqartuullutik. Ukiuni kingullerni atuariimmi sulisut annerpaamik 50 %-ii ilinniarsimasuupput. Tamatuma sania-tigut immikkut atuartsisoqartarnissamik pisariaqartitsineq qaffariartorpoq. Atuarfik 19-inik immikkut pisariaqartitsisunik atuartuuteqarpoq, sulisullu sisamat piffissaq tamakkerlugu immikkut atuartsinermik ingerlatsisuullutik.

Tamanna tunngavigalugu nunaqarfimmi atorfinitsitsiniarnerup nukittorsarnissaanut sivilissusilerikkamik atorfinitsitsinukut immikkut atorfinitsitsinermi atugassarititanik atuutilersitsinissap pisariaqarnera nalilerneqarpoq.

Atuilluatuunikkut aningaasaqarnikkullu kingunerisinnaasai

Sivilissusilerikkamik atorfinitsitsisarnermik pilersitsinermi atuilluarnerusumik inuttaqarnissamut aammalu atuartsinermi annertunerusumik patajaannersusitsinissamut tunniuseqaassasoq naatsorsuutigineqarpoq. Suliniut tapiissutitigut imaluunniit immikkut atugassaqaartitsinikkut annertunerusumik aningaasartuuteqarsinnaavoq, illuatungaatigulli paarlatsinut, atorfinitsitsiniarnermut sulisullu paarlakaannerinut aningaasartuutaasunut apparsaataasinnaanik nalilerneqarluni.

Aningaasaqarnikkut kingunerisinnaasai		
Aningaasartuutit suussusii	Ilinniartitsisumut ataatsimut assersuut	Ukiumut aningaasartuutit (miss.)
Sulissusarsiornermi aamma atorfimmititsinnarnarluni tapit	1.700-2.500 kr. qaammammut	20.000–30.000 kr.
Nutsernermut aningaasartuutit (ataasiartumik aningaasartuutit)	Nunaqarfimmut nuunneq	50.000–80.000 kr.
Angalanernut aningaasartuutit	Ukiumut ataasiarluni-marloriarluni angalanerit	10.000–30.000 kr.

Sulisussarsiorneq pilerisaarinerlu	Sulisussarsiorneq atorfinitsitsiner-milu ingerlatsineq	5.000–15.000 kr.
Assersuutit katinneri (ukioq ataaseq)	Tapi + nutserneq + angalaneq	85.000-155.000 kr.-it missaanni

Allaffeqarfiup naliliinera

Allaffeqarfik naliliivoq, Kangerlussuarmi maannakkut sulisoqarniarneq atuarfiup ingerlannissaanut atuartullu atuartinneqarnissaanut neqeroorummot unamminartitsimmat, anguniagalimmik sulisussarsiornermut atorfimiititsiinnarnissamullu suliniuteqarnissamik immikkut pisariaqartitsisoqartoq.

Patajaannerusumik sulisoqarnissamut aammalu ilinniartitsisutut perorsaasutullu ilinniarsimasunik annertunerusumik orniginarsaanissamut sivilissusilerikkamik atorfinitsitsisarnerit iluaqutaassasut.

Aaqqiissut siunissamut pilersinneqarnissaa kissaatigineqarpoq, maannakkulli atorfillit pingasut aaqqiissutit ilanngutinneqarnissaanik kissaatigineqartunut tapit qanoq iliuuseqarfiginissaat aamma isummerfigineqarnissapput. Ilinniartitsisunut pingasuusunut piffissamik akuersissuteqarnermit tapit tunniunneqassanersut, sivilissusilerikkamik atorfininnermut ikaarsaassanersut aammalu ilinniartitsisut nutaat siunissami sivilissusilerikkamik atorfinitsinneqassanersut ataatsimiititaliamit toqqarneqassaaq.

Innersuussut

Taamaammat allaffeqarfiup innersuussutigaa:

1. Kangerlussuarmi atuarfimmot ilinniartitsisunik perorsaasunillu ilinniarsimasunik orniginarsaanissamut atorfeqartitsiinnarnissarlu siunertaralugit, siunissamut sivilissusilerikkamik atorfinitsitsisarnermik periarfissiisoqartarnissamut ataatsimiititaliaq akuersissuteqassasoq.
2. Sulisooreersunut pingasuusunut tapeqartitsinissamut aammalu aaqqiissutit atuutileranerit tapit tunniunneqartarnissaannut ataatsimiititaliaq isummissasoq.
3. Aaqqiissummot allaffeqarfik tigussaasunik sinaakkusiissasoq, matumani aningaasaqarneq atorfinitsitsinermullu atugassarititaasut ilanngullugit inaarutaasumik akuerisassanngorlugit.

Ilinniartitaanermut ataatsimiititaliap suliamik suliarinninnera

Ataatsimiititaliap 9. februar 2026 ataatsimiinnerani innersuussutigineqartut akuersissutigineqarput KB-mut ingerlateqqinneqassasoq.

Innersuussut

Ilinniartitaanermut ataatsimiititaliap Kommunalbestyrelsimut innersuussutigivaa akuereqqullugu,

1. Kangerlussuarmi atuarfimmot ilinniartitsisunik perorsaasunillu ilinniarsimasunik orniginarsaanissamut atorfeqartitsiinnarnissarlu siunertaralugit, siunissamut sivilissusilerikkamik atorfinitsitsisarnermik periarfissiisoqartarnissamut ataatsimiititaliaq akuersissuteqassasoq.
2. Sulisooreersunut pingasuusunut tapeqartitsinissamut aammalu aaqqiissutit atuutileranerit tapit tunniunneqartarnissaannut ataatsimiititaliaq isummissasoq.
3. Aaqqiissummot allaffeqarfik tigussaasunik sinaakkusiissasoq, matumani aningaasaqarneq atorfinitsitsinermullu atugassarititaasut ilanngullugit inaarutaasumik akuerisassanngorlugit

Aalajangiineq

Ilanngussaq

1. Kangerlussuarmi pissutsit pillugit allaaserisaq

Imm. 4.4 Nunatta Kitaani Nunamik allanngutsaaliukkamik pilersitsineq pillugu nalunaarusiaq pillugu tusarniaaneq

Journal nr. 80.11

Tunuliaqutaq

Nunatta Kitaani Nunamik allanngutsaaliukkamik pilersitsinissaq pillugu nalunaarut Pinngortitamut Avatangiisinullu Naalakkersuisoqarfiup 2025-mi decembarip 17-anni tusarniutissanngorlugu nassiuppaa. Tusarniaanermi akissuteqarnissaq 2026-mi marsip pingajuannut killeqarpoq.

Maleruagassatigut tunngavigisaq

Pinngortitamik illersuineq pillugu Inatsisartut inatsisaat nr. 29, 18. december 2003-meersoq. Kalaallit Nunaanni masarsoqarfiit nunanit tamalaanit toqqarneqartut illersorneqarnissaat aamma timmissat imarmiut ilaasa illersorneqarnissaat pillugu Namminersorlutik Oqartussat nalunaarutaat nr. 12, 1. juni 2016-meersoq.

Pilersaarusiorneq aamma nunaminertat atorneqartarnerat pillugit Inatsisartut inatsisaat nr. 17, 17. november 2010-meersoq.

Pissutsit atuuttut

Qeqqata Kommunalbestyrelsen 2020-mi februarip 27-anni ataatsimiinnermini aalajangiivoq, Kangerlussuup avannaatungaani Kalaallit Nunaanni Masarsoqarfiit annersaannik Eqalummiut Nunaat-Nassuttuup Nunaa-nik ilaqartumik nuna allanngutsaaliugaq pillugu pilersaarutit ingerlateqqinneqassasut.

Kommunalbestyrelsen aalajangiivoq, Kommune Qeqertalik, Namminersorlutik Oqartussat, inuussutissarsiutigalugu piniartut, takornialerisut allallu ilanngutsinneqassasut siunnersuummik tapersersuisoqarnerisooq paasiumallugu. Masarsoqarfiup pingajorarterutaata missaa Kommune Qeqertalimmi inissisimavoq Kommune Qeqertalillu siunnersuummut isumaqataalluariarmat kommunit marluusut Avatangiisinut Pinngortitamullu Naalakkersuisoqarfimmik susasaqartunillu allanik peqateqarlutik suleqatigiissitaliorput.

Borgmesterit Ane Hansen aamma Malik Berthelsen illoqarfinni nunaqarfinnilu 2022-mi 2023-milu innuttaasunik ataatsimiisitsipput, tassani Nuna Allanngutsaaliugaq pillugu pilersaarutitut annertunerisumik tapersersuisoqarluni. Piniarneq ingerlareersoq kalluarneqarnaviannngitsoq ilanngullugu Nuna allanngutsaaliugaq pillugu pilersaarutit nassuiaatigineqareernerisali aatsaat kingorna. Paatsuunganartinneqarnikuuvoq sulilu paatsuunganartinneqarluni, inatsisitigut tunngavissaq oqaasimik `eqqissimatitsineq`-mik aallaaveqartinneqarmat, naak piniarneq ingerlareersoq kalluarneqarnaviannngitsoq.

EU-mik suleqatigiiffik Grøn Vækst aqutigalugu Nuna allanngutsaaliukkamut Avatangiisinut Pinngortitamullu Naalakkersuisoqarfik EU aningaasanik pissarsinikuuvoq. Kommunit peqatigalugit Avatangiisinut Pinngortitamullu Naalakkersuisoqarfik suliami suliniummik aqutsinermik tigusiivoq aammalu Namminersorlutik Oqartussani immikkoortortat aqutsisoqatigiinni inuttaqartinneqarlutik. 2025-mi innuttaasunik ataatsimiisitsinermi saqqummiunneqartumik nunataq pillugu nalunaarusiamik tunngaviusumik suliarilluakkamik Pinngortitaleriffik suliaqarnikuuvoq.

Kommune Qeqertalimmi Nuna allanngutsaaliugaq annertusineqarnissaa Avatangiisinut Pinngortitamullu Naalakkersuisoqarfiup aamma Qeqertalik Kommunep kissaatiginikuuvaat, taamaalilluni Qeqertarsuup tunuata kujataani inissisimasup Nateernap nunataani Masarsoqarfimmik aamma Masarsoqarfiit marluusut akornanni nunatamik ilaqalissalluni. Qeqqata Kommuniani nuna qerineq ajortumi nunataq allilerneqarnikuunngilaq. Aqutsisoqatigiit Sermersuup ilaa Nuna allanngutsaaliukkami ilaatinneqarnissaa pillugu isumaqatigiinnikuupput.

Eqqissisimatitaasoq pusi Qasigiaq, nerleq, nerlerit imarsiortut tuttullu piaqqiortut pillugit mianerinntoqartariaqartoq Pinngortitaleriffiup tunuliaqutissatut nalunaarusiaani tikkuussisoqarpoq, taamaattumik uumasunut suussutsinut sisamaasanut mianerinntussamik naluaarummi nunatanut assinngiitsunut A, B, C aamma D-mut ilanngussisoqarnikuuvoq. Qeqqata Kommunianni nunatanik A-nik, B-nik C-nillu pilersitsisoqarnikuunnigilaq, kisianni Kangerlussuup avannaatungaani nunataq D1 tuttut piaqqiortut mianeriniarlugit. Tassunga ilaassaaq Qeqqata Kommunalbestyrelsiata immikkoortikkusutaatut aqqutit ilisarnaasersukkat avataatungaanni piffissami 20. maj 20. juni uninngaartoqartassanngilaq, angallattoqartassanngilaq suliaqartoqaranilu.

Atuilluartuunissakkut kingunerisinnaasat

Pinngortitaq uumasullu aamma nunatassinneqarpata, tassani eqqissisimanerpaatitaasinnaallutik atuilluartuunerussaaq. Tamanna ingammik pingaaruteqarpoq kommuni nunap ammaannartup annertunerusunut atorneqarnissaanut pingaarnersiulerpat, soorlu aqqusinniormut, takornariaqarnermut, aatsitassarsiormut allanullu.

Aningaasaqarnikkut allaffissornikkullu kingunerisinnaasai

Qeqqata Kommuniata Nunap allanngutsaaliugartaata ilaa Masarsoqarfimmik aamma nunarsuarmioqatigiinnut kingornussassaqaarfimmi Aasivissuit-Nipisat ilaanik ilaqarmat, kommunimut aningaasaqarnikkut allaffissornikkullu kinguneqaqqissanngitsoq naatsorsuutigineqarpoq. Nunamik allanngutsaaliukkamik kommuni nakkutilliisuusaaq, kisianni Kangerlussuarmi kommunip park rangeria nunarsuarmioqatigiinnut kingornussassaqaarfimmi nakkutilliisooreerpoq aammalu siunissami tuttut piaqqiornerisa nalaani takonarissanit il.il. akornusersorneqannginnissaat annertunerusumik ukkarissallugu.

Nuna allanngutsaaliukatut toqqaanermi ilaatigut Kangerlussuup avannaatungaani piaqqiorfinnik illersuineramik pitsaasunik kinguneqassasoq naatsorsuutigineqarpoq. Aqutsisoqatigiit Nuna allanngutsaaliukkami eqqakkanik paaasarnissamut avataanit aningaasalersuinnaasunik periarfissanik misissuivoq. Nunami allanngutsaaliukkami ilisimatusarnerulerneq aammalu tuttut umimmaallu pillugit ilisimasaqarnerulertoqassasoq kingunissat ilagissagaat naatsorsuutigineqarpoq, tamannalu uumasooqatigiit ikilinerannik misigisoqarpat aqqiissutissanik nassaarnissamut pingaaruteqarpoq. Taamaattorli Sisimiut aqutsiveqarfiani tuttut amerlassusaat maannakkut ajunngitsorujussuarmiippoq kisianni siusinnerusukkat annilaarnartumik appariaateqartoq nalunaarsorneqarnikuuvoq, tamatumani Kangerlussuup avannaatungaani tuttut piaqqiorfiit amerlasusaasa ineriartormeritut aalajangiisuunikuugunarlutik.

Allaffeqarfiup naliliinera

Allaffeqarfik naliliivoq, nalunaarut suliarineqarnikuusoq tunngavigalugu Nunamik allanngutsaaliukkamik pilersitsineq nunap immikkoortuanut suliniutaassasoq pitsaasoq. Nuna allanngutsaaliugaq takonarissanit, ilisimatusartunit aningaasaateqarfinniillu soqutigineqartussaavoq, tamanna Kangerlussuarmut nunallu immikkoortuani takornariaqarnermi ukkatarineqarnermi qitiusussaavoq. Ilutigitilluguli nalunaarutit qulakkeertussaavaa, tuttut piaqqiornerisa nalaani akornusersorneqannginnissaat, soorluttaaq piniarneq ingerlareersoq pisarnermisut ingerlaannarsinnaasoq.

Innersuussut

Aningaasaqarnermut ataatsimiititaliamit kommunalbestyrelsimiillu akuereqqullugu innersuussutigineqarpoq,

- Annertunerusumik oqaaseqaatitaqanngitsumik Nunatta Kitaani Nuna allanngutsaaliukkamik pilersitsineq pillugu nalunaarut akuersissutigineqassasoq

Aningaasaqarnermut ataatsimiititaliap suliamik suliarinninnera

Ataatsimiititaliaq 17 februar 2026 ataatsimiinnerani innersuussutigineqartoq akuersissutigineqarpoq.

Innersuussut

Aningaasaqarnermut ataatsimiititaliap Kommunalbestyrelsimut innersuussutigivaa akuereqqullugu,

- Annertunerusumik oqaaseqaatitaqanngitsumik Nunatta Kitaani Nuna allanngutsaaliukkamik pilersitsineq pillugu nalunaarut akuersissutigineqassasoq

Aalajangiineq

Ilanngussaq

1. Uunga siunnersuut: Nunatta Kitaani Nuna allanngutsaaliugaq pillugu nalunaarut (KAL/DK)
2. Ilanngussaq 1 Nalunaarut Nunatta Kitaani Nuna allanngutsaaliugaq - Nunap assingi - Sinaani killeqarfiit (KAL/DK)
3. Ilanngussaq 2 Nalunaarut Nunatta JKitaani Nuna allanngutsaaliugaq - Nunap assingi - Im-mikkoortut ilaat (KAL/DK)
4. Ilanngussaq 3 Nalunaarut Nunatta Kitaani Nuna allanngutsaaliugaq - Killersuinernik nassui-aatit (KAL/DK)
5. Nunatta Kitaani nunamik allanngutsaaliukkamik pilersitsisoqarneranit kingunissanik missu-inerugallartoq (KAL/DK)
6. **natur.gl/wp-content/uploads/2025/05/Baggrundsrapport-forud-for-etablering-af-nationalpark-i-Vestgroenland_20250520-KAL.pdf**
natur.gl/wp-content/uploads/2025/05/Baggrundsrapport-forud-for-etablering-af-nationalpark-i-Vestgroenland_20250520.pdf

Imm. 4.5 Nunaqarfimmi Aqutsisunik tunuarnissamik qinnuteqaat – Dorthe Olsen

Journalnr. 01.01.03

Tunuliaqutaq

Nunaqarfimmi Sarfannguani Itillimilu Aqutsisunut ilaasortaq Dorthe Olsen mail-ikkut qinnuteqarpoq Sarfannguani Itillimilu nunaqarfimmi aqutsisuniit tunuarnissamik ulloq 16. Januar 2026.

Maleruagassatigut tunngavissaq

Kommunalbestyrelsinut, nunaqarfimmi aqutsisunut ilagiillu sinniissaanngu qinersisarnerit pillugit Inatsisartut inatsisaat nr. 27, 28. November 2016-immersumi §54:

“Ilaasortaq qinigaaffiup iluani kommunalbestyrelsimut tunuarniarluni qinnuteqarpat, qinnuteqaat taamaattoq qanoq kinguneeqartinneqassanersoq kommunalbestyrelsen aalajangissavaa”.

Pissutsit atuuttut

Sarfannguani Itillimilu ataatsimoorussamik nunaqarfimmi aqutsisuusut tallimanik ilaasortaqarput, tassa Naleqqamiit pingasut Siumumiit marluk. Sinniisussat allattorsimaffiat naapertorlugu, sinniisussaqaanngillat ilaasortaq ataaseq tunuarnertigut.

Qinersinermi inatsit naapertorlugu kommunalbestyrelsen naammaqqutissamik qinersinissaq aalangiiffigisinnaavaa. Nunaqarfimmi aqutsisut suli atuutissapput april 2029-ip naanissaata tungaanut. Kommunit aquneqarneranut inatsit mallillugu nunaqarfimmi aqutsisut suli ukiuni pingasuni atuuttussaapput.

Allaffeqarfiup naliliinera

Sarfannguani Itillimilu nunaqarfimmi aqutsisut suli ukiuni pingasuni atuuttussaannerat isiginiarlugu, allaffeqarfiup innersuussutigivaa naammaqqutissamik qinersisoqartariaqartoq. Taamaalluni sapinngisamik innuttaasut amerlanersaat sinniisoqaqqullugit.

Innersuussut

Allaffeqarfiup innersuussutigissavaa, kommunalbestyrelsen akuersissutigissagaa

- 1) Dorthe Olsenip Sarfannguani/Itillimi nunaqarfimmi aqutsisuniit tunuarniutaa akuersissutigissagaa
- 2) Sarfannguani/Itillimi naammaqqutissamik qinersinissaq siunertarlugu kommunalbestyrelsen Qinersinermut ataatsimiititaliamut innersuussusiussasoq.

Aalangiineq

Ilanngussat

1. Dorthe Olsenip nunaqarfimmi aqutsisuniit tunuarnissamut qinnuteqaataa
2. Sarfannguani/Itillimi nunaqarfimmi aqutsisunut sinniisussat allattorsimaffiat

Imm. 6.1 Nunarsuarmioqatigiinnut kingornussassaqaarfimmik Aasivissuit – Nipisat suliaqarnerup ingerlaqqinnera

Journalnr. 80.11

Tunuliaqutaq

Aasivissuit - Nipisat" 2018-imi juunip 30-anni UNESCO-mi allattorsimaffimmiitinneqalerpoq: Sermersuup aamma Immap akornanni Inuit Piniarfii.

Maleruagassatigut tunngavigisat

Namminersorlutik Oqartussat nalunaarutaat, kulturikkut eriagissat allat pillugit sumiiffimmik Kalaallit Nunaata kitaani Aasivissuit - Nipisallu eqqaanni 30. januaari 2018.

Pissutsit atuuttut

Nunarsuarmi kingornussassaqaarfimmik ingerlatsinissamik suliniutip immikkoortuanik siullermik Qallunaat Nunaanni aningaasaateqarfiit pingasut - Aage V. Jensen, Charity Foundation, Augustinusfonden aamma 15. juni Fonden - kiisalu Namminersorlutik Oqartussat ingerlatseqatigiiffiat imminut pigisuusoq Greenland Visitor Center aamma Qeqqata Kommunalbestyrelsiata aningaasalersornikuuaat.

Piffissami 2021-25 allatseqarnermi ikiuunnermut aamma suliassanut tallimaasunut 9,5 mio. koruunit atorneqarnikuupput.

1. Ingerlatitseqqiinissamut illersuinissamullu suliniutit pilertortut (paasissutissiineq allagartarsualersuinerlu)
2. Ingerlatsinermi najoqqutassamik (takorluukkat pappiliannngortitneri, eqqortiasinnaasunik misissuinerit, innuttaasunik akuutitsineq) suliaqarneq
3. Nunami (Nipisat, Aasivissuit, Sarfannguani pavillioni aamma Sermersuarmut aqqummi issiaartarfik) suliniutit.
4. Katersugaasvinni (illup iluani silataanilu saqqummersitsinerit) oqaluttuat ingerlatitseqqiinerillu
5. Tusagassiuutit tusagassiuutigullu ineriartortitsinerit (nuannarineqarnissaanik ilisimatusarnikkut atuagassiaq, nittartagaq quppersagarlu sumiiffissiuat)

Tamakku saniatigut Greenland Visitor Center taaguusikkami "Nuna tamakkerlugu Takusassaqqissut" ataanni aningaasaateqarfinnut kommuninullu takusassannngortinneqartuni naapertuuttumik sumiiffinni pingaarutilinni suliniutinik arlalinnik ingerlatsinikuuvoq.

Katersugaasivimmi saqqummersitanik aammaanermi Kommunalbestyrelsi ilaavoq suliniummilu suliniutit tigussaasut naammassineqarnikuusut alakkarternikuullugit. Suliniut kingulleq tasaanikuuvoq nuannarineqartunik ilisimatusarnikkut atuakkamik saqqummersitsisarfik GAD aqutigalugu saqqummersinneqartumik saqqummiussineq, taanna allaaserinninnernik pitsaasunik pissarsiffiunikuuvoq.

Immikkoortoq 2 pillugu qinnuteqaat ingerlatsinissami najoqqutassiaq malitsigisaanillu itisiliinerit saqqummiunneqartunik tunngaveqartumik nassiunneqarpoq. Immikkoortoq 1-imi ineriartorneq aammalu suliamut sammivik ingerlaqqiffiususaaq pillugu kommunalbestyrelse ingerlaavartumik ilisimatinneqartarnikuuvoq.

Qeqqata Kommuniata ingerlatsinissamut najoqqutassiassatut missingiut aningaasaateqarfinnut pingasuusunut 2024-mi novembarimi saqqummiuppaa. Malitsigisaanik takorluukkanut

takussutissanik, pingaarnersiulluni missingersuummik suliniummilu itisiliinerulluni allaaserinninnernik suliaqarneq ingerlateqqinneqarpoq.

Taakku tunngavigalugit immikkoortoq 2 ingerlanneqarnissaanut 2025-mi aggustimi kommuni aningaasaateqarfinnut katillugit 16,5 mio. koruuninik qinnuteqaateqarpoq. Juulli sioqqutilaaraa aningaasaateqarfiit nalunaaruteqarput, aningaasat qinnuteqaataasut aningaasartaannut tamakkiisunut naammattunik 5,5 mio. koruunik tamarmik immikkut aningaasaliiniarlutik.

Immikkoortoq 2 (2026-2028).

Aningaasaliissutit suliniutinik tullinnguuttuniik ingerlatsinissamut periarfissiipput:

A. Kulturikkut nunap ilaa piujuartoq

- Allatseqarnermut tapertaaneq
- Eqqortiasunut nalilersuinerit
- Innuttaasunik peqataatsineq
- Ilisimatusartunik suleqateqarneq

B. Nunarsuarmioqatigiinnut kingornussassap tunngavilernera

- Meeqqat atuarfiannut ilinniutitut iserfissamik digitaliusumik ineriartortitsineq
- Takornarissanut ilitersuutitut atortussamik pikkorissaanermillu ingerlatsinermik suliaqarneq
- Nunarsuarmioqatigiinnut kingornussassaqaqarfinnit oqaluttuanik katersineq
- Nerisassanik mamarunartunik eqqumiitsuliornikkullu immikkuullarissunik ineriartortitseqqineq

C. Angalaneq takisooq

- Aasivissuarni nunarsuarmioqatigiinnut kingornussassaqaqarfinni illuaqqamik pilersitsineq
- Illuaqqanik oqqisarfinnillu Amerloq verdensarvsloop-imik pilersitsineq
- Piniarnermik mianerinninnissaq pillugu Arctic Circle Trailimi pisuttunut paasissutissiinermut atortussat

D. Inoqarfiit pisussaaffiliisut

- Sisimiuni katersugaasiviup illutassanik nutaamik piareersarneq
- Sarfannguani niuffaffeeqqamik pilersitsineq
- Nunarsuarmioqatigiinnut kingornussassaqaqarfinni aallaavilimmik illoqarfinni eqqumiitsuliinik ingerlatitseqqineq

E. Digitalimik misigisassat

- Qanganitsanik nassaanik 3D atorlugu takunnissinnaangortitsineq
- Ilisimatusartut sumiiffimmilu ilisimasanik qarasaasiakkut nunap assinganik suliaqarneq

Atuilluartuunissakkut kingunerisinnaasat

Immikkoortoq 1 tasaanerunikuuvoq nunarsuarmi kingornussassaqaqarfinnik ingerlateqqineq qulakkeerininnerlu. Immikkoortoq 2-mi nunarsuarmi kingornussassaqaqarfinnermi inissisimanini suli paariinnarnissaanut piniarnermilu kulturi eqiterunnissaanut nungusaataangitsumillu ineriartortinneqarnissaanut immikkoortumi suliniutit nukittorsarneqassapput.

Takorluukkanut takussutissaq takorluukkanik, anguniakkanik anguniakkanut periusissianik akimortumillu suliniteqarfiusunik ineriartormik matuminnga tapertaasunik imaqqarpoq.

Aningaasaqarnikkut allaffissornikkullu kingunerisinnaasai

Aningaasaateqarfiit aningaasaliissutaat 2018-imi UNESCO-p nunarsuarmioqatigiinnut kingornussas-saqarfinnut allattorsimaffianiilernermut tunngaviunikuusunut kommunip suliniutiginikuusaanik ar-lalinnik piviusunngortitsinissamut periarfissiipput.

Suliniutip ilai ataasiakkaat pillugit allaffissornikkut pissutsit paasineqareeriarpata suliaq anin-gaasaqarnikkut kingunissaqanngitsoq aningaasaqarnermut ataatsimiititamukassaaq.

Allaffeqarfiup naliliinera

Allaffeqarfiup naliliinera tassaavoq, suliaq Aasivissuit - Nipisat pitsaasumik ineriartortoq aammalu aningaasaateqarfinnit aningaasaliissutit pissarsiarineqartunik suliniut piffissami 2026-2028 ingerla-teqqinnissaanut eqiterunnissaanullu qajannaatsumik tunngavissiissasoq.

Innersuussut

Allaffeqarfiup innersuussutigivaa, paasissutissiissut kommunalbestyrelsimit tusaatissatut tiguneqas-sasoq.

Aalajangiineq

Ilanngussaq

1. Nunarsuarmioqatigiinnut kingornussassaqaqarfinnut Aasivissuit - Nipisat takorluukkanut takus-sutissaq
2. Suliniummik ingerlatsinissamik immikkoortoq 2-mut missingersuut

Imm. 8.1 Tamalaat